

四庫全書

集部

欽定四庫全書

三華集卷四

明 錢子正 撰

綠苔軒集四

五言律詩

聞鴈

灌莽望不極，饑鴻何處投。
本因湖海志，却訝稻梁謀。
砧杵千家月，關河萬里秋。
數聲行客耳，腸斷不禁愁。

晚眺

落日在衣袂客愁那可禁
還將千點淚滴盡異鄉心
涼月家家笛西風處處砧
明朝湖海去蹤跡轉難尋

客中長至

地僻少來客病多踈故知
重逢一陽日忽憶少年時
白馬黃衫俊金樽翠袖宜
如今茅屋底揮淚強裁詩

戊申新正

客中逢節物情緒轉淒涼
強笑無歡意相看非故鄉
浴

鳧春水動浮蟻臘樽香但祝堯年永恩霑化日長

旅寓還家

時戊申三月十七日也

別去久作惡歸來仍愴神咨嗟問生死涕淚滿衣巾
邑里冠裳改桑麻雨露新只今農事迫努力向青春

憶常德子原炳

我憶從軍子經年缺旨甘異鄉書不到垂老我何堪
巫峽滄江外西神北斗南相思不可見歸夢隔湘潭

歸鴈

歸鴈亦有侶悲鳴何太多
冷衝燕地雪晴下楚江波
欲倩傳書札須知避網羅
行人巫峽畔憑問意如何

此日足可惜

此日足可惜青春忽輕拋
野花紅匝匝溪水綠週遭
我歌黃金縷君撥紫檀槽
何為自纏縛坐令生二毛

喜晴

久雨厭苦濕喜晴眉暫伸
薄雲紛欲散遠岫迴初新
登穀秋堪望行囊老更貧
今宵月色好照見獨愁人

長嘆

掩卷獨長嘆謀生良苦艱無因足衣食那免失鄉關玉
向荆山得珠當合浦還功名豈難事俯仰惜衰顏

病軀

秋思豈無賴饑寒悲病軀大田饒擺種公廩待征輸書
籍看何益行藏老更迂自無軒冕志羈鞅不曾拘

村居

城郭逼人事避煩隣竹林樹藤將蔓遠苔逕到門深自

有幽棲意初非遁世心昔年湖海志此日竟銷沉

招客飲

學仙不可得遁世亦無由賴此盃中物時消身外憂若肯同雞黍還來且獻酬五陵冠蓋後衰草遍荒丘

新月

新月不待暮倉忙迎夕暉過雲時顯晦避日少光輝纖學蛾眉巧愁憐鶴髮稀看成幾圓缺送老一柴扉

聞桂香有感

丹桂吾所愛吹香何處來非徒懷草木為爾憶池臺花
向慈親折筵從好客開只今俱寂寞灑淚有餘哀

題陶靖節

我愛陶元亮遁世亦無心門栽五株柳手撫不絃琴學
任諸兒懶盃從野老斟斯人不可見懷古一沾襟

庚戌歲除

今夕歲除夕故鄉如異鄉不驚身老大自覺景淒涼取
樂琴書盡求賢道路長不眠非守歲冰炭落衰腸

題王子淵孤雲卷

冉冉復依依因風吹翠微
行空殘絮薄度水一漚飛
不為商霖出非從楚岫歸
僧留半間屋相伴兩忘機

深春不見花

寂寞荒村裏深春不見花
病餘疎節物老去惜年華
少俊輕前輩衣冠得幾家
陽坡吾所愛留種邵平瓜

扇

一別動經歲炎歊同踵門
不言秋節怨但感篋中恩
暫

結投懷好聊為握手論時交姑共事能得幾朝昏

鴈

幾時離朔地此日到南州口腹適足累稻梁非易謀
寒沙積雨腸斷海門秋不有思鄉者因君動旅愁

夕月

小采事由古相傳盛漢唐早朝恭覲禮暮見肅乾綱紫
禁嚴仙仗彤闈拜兩郎聖朝崇典故日下近恩光

社日過田家飲

我本愛酒者從人醉臉紅田家大作社樽酒勸治聾昨
日朱顏客今朝白髮翁胡為不取樂低首事樊籠

寄僧壽巖隱

猶憶東溪寺陰陰紫竹林小亭留酌酒方石可彈琴一
別知幾載常時牽遠心何當拈竹杖乘興即登臨

秋江送客

萬里滄江闊舟行八月秋日明沙磧露風動浪花浮旗
影懸檣斗湍聲入舵樓夜深星斗近燈火是揚州

有弟久不見

有弟久不見今為鄉校書無因致消息漫爾獨踟躇未
斷豐城劍空煩陋巷車南湖有來客報我近何如

又

有弟久不見米珠薪桂秋艱難不易遣歲月若為酬名
竊能詩重官因老病休新年倘相憶乘興在扁舟

又

有弟久不見空勞書往還向來顏色好此際鬢毛斑聞

道添新恨懸知憶故山
吾衰苦相憶那免淚潸潸

又

有弟久不見故鄉
違十年投瓊今不競
佳句盡能傳舊擬揚雄
宅生憎季子田山城好行
樂應得並時賢

寄九弟

貧病我難往羈棲爾未來
漂零俱已老懷抱轉堪哀
姜被何年共田荆幾度開
人生樹花發容易委蒼苔

立春日有感

卧病兼時久初秋復早春孰云佳節日猶滯苦吟身草
色知時改梅花照樹新翠盤青菜縷行酒屬何人

江上

歲晚滄江上客懷非壯遊秋霜歸短髮夜雨夢孤舟未
卜揚雄宅空憐季子裘故人霄漢上誰復問淹留

秋暮

短日乘寒薄高風入暮狂饑蛩晨響壁隣碓夜侵牀食
少身常瘦家貧老更忙儒冠良自悞此日轉荒唐

乙丑元夕

寂寞上元夜荒村無可觀
破牕燈弄影空砌雨生寒
薄酒難成醉悲歌不是歡
邊城有戍客誰與寄平安

西庵

習懶貪幽靜西庵宜避諠
獨拈方竹杖時過給孤園
展席臨清沼看書向小軒
老僧忘物我進退總無言

春暮

三月春欲暮遊蜂渾未知
尚迷芳草逕猶遠落花枝
新

漲翻紅浪高槐成翠帷日長茅屋靜時有燕差池

懷寶慶子原炳

星紀周天別邊城尚要防負戈晨帶月枕甲夜經霜為
孝親雖重懷忠義更長何時共談笑休馬華山陽

附

五言絕句

所思

塵底坐清晝寂寞有所思若言心似鐵那得鬢如絲

夜雨

誰道春宵雨滋花未要晴須知有愁耳厭此斷腸聲

又

暮雲吹不斷風定又還生散作竹牕雨蕭蕭送五更

憶子原炳

想得還鄉夢應迷客路還定嫌秋雨夜牕戶近芭蕉

雨

薄暮隴雲濕西風吹不晴芭蕉無意緒點點挾秋聲

風

牕外無多竹秋來翠影寒夜深風力惡吹折最長竿

風雨

乙丑春三月綿綿風雨多東郊農事動天意果如何

秋水

秋水清可鑑歷歷見遊魚溪邊有磐石把釣意何如

獨嘆

有客歌燃豆無人嘆摘瓜江村一夜雨腸斷紫荊花

久雨

春半苦多雨，兼旬猶未晴。試看橋下水，欲與岸相平。

風箏

因風發清音，高舉輕微質。浪引萬丈繩，不繫西飛日。

絕句

蓮肉甘於蜜，蓮心苦似茶。飽諳甘苦味，歸去老江湖。

三華集卷四

欽定四庫全書

集部

三華集卷七至

詳校官中書臣覆照

助教_臣常循履勘

總校官進士_臣朱 鈐

校對官修撰_臣吳錫齡

謄錄監生_臣劉廷勳

欽定四庫全書

三華集卷五

明 錢子正 撰

綠苔軒集五

五言古詩

旅寓

舊聞埽橋名今熟埽橋路平生拙衣食浪迹走親故輾
轉田野中豺虎正馳騫年荒粟粒貴鮮飽非敢慕時無

魯朱家孰肯延季布長嘆寄食難彷徨歲云暮擬歌哀
王孫一拜漂母墓

自嘆

讀書性魯鈍為商技踈愚衣食常苦艱終歲每跼蹐高
門有餘粟俛首慙曳裾古來多坎壈我獨何嗟吁

贈賈明道

吾友賈明道往年入陽山昔也儒服去今作道士還自
號野雲子飄然脫羈樊豈遇黃初平至人授大丹蕭蕭

冰雪姿嘯傲煙霞間我欲從之遊高蹤杳難攀

馴鶴

羨爾雲中物孤飛自高騫朝翔北海渚暮宿蒼梧顛偶
墮繒繳機失路那可言今乃籠中鳥側身難轉旋飲食
仰於人飢渴誰能憐引吭明月夜矯首秋風天豈忘青
田侶無由共翩翩

呈徐相國

東南多廢田榛莽望不極戎馬事戰爭洒血地為赤天

兵掃妖氛肩膺始暫息仁風播九有萬物含德色聖君
憫黎元久矣厭兵革忍令膏腴田淪弃作硤瘠下民困
未甦相府有餘力遴選多材賢獻議建方策連艘接挽
輸白粲千萬石流亡免溝壑來歸就農食銷兵作犁鋤
運斤斷荆棘向來狐兔叢轉顧田野闢豈唯相君賢要
亦僚佐德豈唯全活多要亦邊儲積好風吹綠秧剡剡
動恩澤遂令憔悴鄉賦庶皆上國腐儒百無補曳裾竟
何益偶來謁諸賢尊酒沾坐席復知好士心不弃山野

質願言歌文明共躋仁壽域

失物復得喜而賦此

天風捲孤蓬滄海渺一粟蓬飛絕回蹤粟飄亡轉矚豈
謂一日間二者能再復稍類破鏡圓頗似斷絃續物理
不可期天意寧在速雖云小小事亦是慰心曲得失本
偶然作詩聊捧腹

種松

道人種松苗紛紛遍田里遮藏庇先塋一一列行趾坐

看已青青生意似可喜二年即蒙蒙戢戢搖狗尾應待
十年強便須把握比旁人向我笑癡計不自恥爾景已
逼迫爾髮朝夕委持此澗壑姿悠悠歷年齒曷不種榆
柳歲月幸無幾區區一寸根何日堪料理我憐凌雲質
苦遭齷齪擬安知棟梁材必從膚寸始截承金露盤裊
裊孰敢比功名在遲暮襁褓勿輕鄙

鳳兮

鳳兮來何鄉翩翩獨徜徉嶰竹得嘉食瑤池飲天漿希

世感德化五彩煥文章崇岡暫一息去去鳴朝陽

雨中懷友

春雲何陰陰春雨復蕭蕭我憶山中人閉戶定連朝欲
將一壺酒相慰破寂寥溪路碧草合遙憶不可招

夢母

憂衰固多睡昏昏當晝眠分明見吾母歡笑如往年問
我何勞苦華髮遽滿顛留連多有語不復記所言欠伸
忽相失幽顯殊天淵衷腸寸寸裂老淚如迸泉

謝人惠食物

平生藜藿腹不厭故山薇秋霜殺百草所啖行復稀
五內日枯竭那得充融肥遠人餉南烹調和出珍竒何如
五侯鯖不羨非萍藿飢腸困危急賴爾解重圍多慙鍾
鼎徒玉食生光輝

詠廣南茄

廣南之茄其高登簷種既異
味且美蓋聞諸劉伯善云

劉公湖海士姓名久幽潛往往談異事悉云目所瞻因
言廣南茄其株高拂簷子細不堅穀味全無苦嚴昔聞

崑崙瓜

煬帝
茄名

云是南中甜今得劉公語敢鬪色味兼吾

家半畝地衆蔬幸纖纖誰能移致此會當誼閭閻點酥
且點酪宜薑復宜鹽秋菘與春韭誇美唯當筍相期長
腰米垂老慰屬饜雅告林下人勿遣何曾嫌

深嘆

兄弟本同根而況於父子天性不可奪恩愛情乃使羔
羊與鴻鴈微物猶解此吁嗟愚罔徒禮義昧至死曾無
慙羽毛自言飽經史

示子

示在家三子欲其附使
慰賚常德子原炳也

有子曰原炳役當常德軍常德在何許遠向桃源濱去
國四千里離家三及春陸經豺虎窟水涉蛟鼉津向年
寄書來祇論力苦辛前日寄書來兼訴勞且貧復言寓
難盡書中僅云云且如月得俸中間事紛紜又有朋儔
輩盃酒諧比隣復來相遺問施報通殷勤易致魚與肉
何從錢與銀此外欲衣食那得充口身晨興與夕寐敢
憚趨蹌頻下避行伍謗上畏官長嗔甘心竭筋力飲泣

時沾巾此書大畧意讀之傷心神憶昔遣爾初衆疑我
不仁我意中年病令爾代此巡何期附軍籍淹留竟沉淪理
宜時餉問慰爾寂寞濱那知賦役餘弗能保昏晨瓶無
五升粟金乏一介鱗漫有長相思遠道何由伸我今命
諸子爾憐手足親願言興惻隱自昔念離羣而况天之
涯久作籠中鶉脫粟幸分惠破衾宜贈紉古人送鵝毛
田父致野芹事感區區私豈在禮數殷豈唯棠棣思斯
亦父子因寒暑相逐逐歲月苦踈踈只今道泰亨已覺

澆風淳當期洗兵馬不賦車麟麟與若老田里歡呼輟
吟呻少長相聚樂擊壤歌堯民

酷熱有客見訪

火雲燒長空袒裼氣欲竭那得陰山水浸我肺肝裂幸
不干王公甘心守炎熱何方少年子此際來晉謁曳裾
加冠巾談笑語不絕焉知我焦勞未荅先喘咽我豈木
偶人五內誠迫切雖非陷囹圄何異置縲紲三伏良可
畏送迎禮悉輟胡為蹈塵火困若挽同列何不卧竹林

箕踞屏車轍作詩寄高朋斯言不妄說

覺衰

脫巾把明鏡白髮踈可數計年半百強有力不可矜憶
昔少壯心馳志越鄒魯蹭蹬三十春百事一無補歸來
卧空谷閭里悉笑侮便謂落羽毛兩翅不復鼓冲霄倘
决起昂頭訝掀舞丈夫事業晚皓首映貂組不知渭濱
翁漁釣豈其伍

雨後

曉雨洗秋山精彩若新沐開軒靜支頤相對省心目山
下多平田望望秔稔熟故居多蓬蒿生計未容復何年
拾瓦礫料理到松菊

懷古

宋纖乃真逸遁世迹何深絕壁得詩句閉門勞客心高
哉士所寶美矣國之琛凌風獨長嘯誰能繼餘音

又

舊聞龐德公未嘗入府州躬耕隴畝中夫婦敬何稠諸

葛人中龍牀下拜不酬劉表乃何人欲致徒邀求屏迹
鹿門去豈非神仙儔

又

我懷晉高士好酒以自污取醉友豪俊酣歌竟朝晡脫
落名教外每稱高陽徒避名名愈彰辱德德不孤豈非
曠世者死生同一途

生事

向日生事繁擾嘆多途官司不假借鞭扑傷肌膚苦

縻二頃田沉滯良自孤桂檝沙棠舟我欲歸江湖

把鏡

脫巾把青銅覺我鬚髻槁向如臨澗松今作經霜草
生無百年顏色豈常好世安得真仙有壯即有老正當
自欣歡對酒且傾倒此理倘能明何必傷懷抱

送翟仲謙房山縣丞二十二韻

美哉翟賢良出處情本真自昔與之遊實緣母黨親芳
華足文史抱負存經綸慶亭家聲舊奕葉多偉人頃因

世道衰著書歸隱淪寂寞二十秋此志幾不伸重逢盛
明時結網求鳳麟英雄志入彀彈冠及茲晨布衣拜天
子願作唐虞臣南宮森俊彥射藝高等倫烏帶映鄉閭
緋綬恩光新房山乃幽燕朴魯風俗淳招衆歲未復瘡
痍尚吟呻君去貳縣長撫字尤當勤勿稱古閒官哦松
度朝曛勿效迂儒踈把酒酬青春相期許國心厚祿勿
為身王程弗可緩報最毋因循天鑑在咫尺皎然瑤與
珉中朝有虛位不難登要津上以荅聖德下以康吾民

贈言倘良規敢煩書諸紳

懷常德子原炳

芳草不盡綠萋萋遍天涯
遠客見春色念爾獨思家
遠道弗可歸音書一何遲
山水三千里由來魚鴈稀

又

東風吹柳絲搖曳蕩春碧
陽和遂敷榮萬物動顏色
父子骨肉情遠戍久離隔
一載不收書好景成惻惻

子原道生朝以詩示之

憶昔爾初誕，新秋動微涼。我母時在郭，好音為報將。母
歸夜已半，迎門喜難量。衆稱得佳孫，歡聲溢高堂。再拜
謝祖禰，團欒列盃觴。往事駒過隙，倏忽三十霜。老者俱
已死，強顏相頡頏。今日爾生朝，感昔成慨慷。悲喜兩相
集，冰炭置我腸。喜者爾成人，粗知柔與剛。悲者痛吾母，
汝母皆已亡。白骨寄淺土，未易反故岡。世事等夢幻，不
若兩相忘。且付一盃酒，歌呼發清狂。死者既不作，願言
生者康。

端午

今日菰黍節荒村獨悲嘯豈無往還人趨向不同調所以心語口形影自相吊憶昔當茲辰開宴集長少朱花與碧草種種相照耀牀頭有黃金身閒買歡笑邇來三十年迅若風過竅向來同飲人九泉不可叫我雖貧病存白髮已滿照齒脫目力短久已勞吟眺漫爾惜嘉時欲酌無可召不如閉戶坐忘言觀道妙莫遣葵榴知寂寞徒見誚

暑暍

炎雲燒長途暑暍正疲極失喜逢古井便覺百憂釋清
泉乏瓶縵漫爾寒涵碧照影空顧戀却坐便歎息何時
設繩罌惠施道傍客

山行

春盡苦多雨雨歇無芳菲我携一枝筇信步無東西但
見衆草碧萋迷連遠堤又見柳條長樹樹翠絲垂尋幽
得深谷險絕無行蹊時聞機杼聲語笑雜犬雞却疑避

世徒不獨武陵溪

鳴臯亭

白鶴比君子皎潔冰霜毫何以揚其儀築亭表鳴臯我
懷鳴臯亭思與君子遊庶幾青田翼翱翔觀九州

中秋對月

八月十五夜天高雲物空月從海底出爛若金芙蓉須
臾到中天璧玉懸青銅隱現月中影疑是清虛宮其間
長生者綠髮雙方瞳復有不死藥玉兔自擣春願言錫

刀圭使我顏如童

調闕子達

與公俱陳壻忝聯姻姬間屈指四十載世事屢變翻先
者二十年施報競往還相見不越月在公禮尤繁後者
二十載寂若無相關蓋因兵凶餘吾家實凋殘公得屯
而亨我方否而艱雲泥既異途其理不可攀靜思宿昔
歡令人發長嘆此理今古共此操今古彈所以管鮑交
世獨美其難寄詩用調笑君其勿厚顏

蒲葵扇

採得青溪蒲織成手中扇
郎今往上國致辭併相餞
六
月道路長飛埃撲人面
願言適清涼際此風雲便
秋露
行沾衣
母棄微物賤團圓倘未毀
再歲復當見

溪上所見

濯足清溪上溪水清漣淪
平生江湖脚悞踏城市塵
家
貧食指衆謀生拙於人
所以負郭田累我常苦辛
何如
溪上人活計在網綸賣魚
養妻子到家復酣醺清風
楊

柳坡良月蘆花津春菘與秋韭自足供昏晨何必富倉
庾自取縻其身

寄子義弟

別近不用嗟別久良可惜惜茲垂暮年十載不相覿不
惜須臾景恐作終世隔子居湖之西我居湖之北大哉
天壤間相去實咫尺昔賢一相思命駕千里適骨肉會
面難何事異今昔緬懷姜仲江昆季那復得令人風雨
夜此情常惻惻寄詩寫我心臨楮淚橫臆

卷五
贈僧遠東林

舊聞廬山下有寺東林名東林未得往今識東林僧疑
是遠禪師閱世幾鍊形在昔不出山今乃萬里情題詩
千首捷飲酒百盃傾杖錫楚天闊挑雲岷岫輕寄謝虎
溪友從游吾未能

狂風

我牆已摧倒竇被風雨欺爾屋雖堅完恐亦難久支此
豈名颶風如我所見稀持此問故老爾輩宜見知云昔

歲癸卯其勢猛更威作惡不崇朝秋日還晴暉只今乃
其亞弗應踰周時驚倒百歲翁異事誠可疑龍集當戊
午孟秋四日期聊用紀一端在實不在詩

雪晴

朝陽布熹微已覺積陰釋晶光射窗戶寒氣愈凌逼初
疑瓊枝瘦復訝冰筋滴依稀火銷膏彷彿山獻脊行人
踏渣滓破屋亂珪壁探穴得僵雀又港發沉鯽豈意玉滿
田竟作泥一尺孰知終惡憎良負初愛惜

達生

吾年過六十榮辱不掛齒百事俱已足未足一死耳但願死得所終作含笑鬼世俗多惡死蓋亦謬斯旨生死無兩途往還同一軌妄以死可悲生者行復爾甚者求長生虛誕尤可鄙寄生若過電來去一彈指推原陶唐初表歲甲子始賢豪與俊傑萬萬不得紀戰鬥與爭奪紛紛莫能擬三千七百載馳騫夢幻裏由來皆寂寞空遺數番紙我等安足云石火照螻蟻但當日飲酒身外

若糠粃作詩寄竹林小阮究此理

挽仲行姪

人之有死生一止復一動如晝之與夜此理今古共其
生寄也聚其死歸也送達人一理觀無喜亦無痛爾常
讀聖書妙義性所縱今年歲在蛇造物相侮弄五十不
稱天破此虛幻夢我今衰且病於世百無用數數哭宗
人兩目復昏瞢不解自歎嗟却使為爾訟訟爾中道廢
綜理事方衆公私互交集負荷非不重家緒幸不泯文

彩得么鳳繼世必多能高堂要隆棟往者既息肩來者
宜勉奉傷哉吊死生那得不感慟

賦醫士徐士廉清夢軒

盲人固無夢在理誠非欺混沌昧於見萬類何從窺所
夢本目識幻想心生機周官發三夢太卜亦掌之無羊
載維魚斯干載維噩今昔孰無夢夢者無賢愚方其受
夢初內爍外物移栩栩隨蝶化飄飄凌空飛立冰兆為
媒炊曰驗喪妻吉凶須有徵占之有高卑詩譏不修德

世俗妄見推南州有高士至今留光輝士庶乃雲仍世
澤稱良醫我病餌公藥每詣城南居造軒覩清夢取義
何新奇公言事貴實斯言有憑依自云遠市朝不夢牙
與緋又云厭積富不夢珠與璣素疾奔競徒不夢干相
知守口常如瓶不夢評是非獨我夢異衆澹然神自怡
夢濯滄浪江炯照鬚與眉夢洗參朮香掬溜泓澄漪夢
撫林下琴杏花零我衣夢滄井傍橘如咀齋房芝夢飲
上池水瑞露嚙三危分竹蔣調逕採菊陶潛籬落月在

屋梁浮雲渡魚磯
敲門驚周公
食棗逢安期
我夢乃如是
名清復何疑
再拜聆公言
非公誰其宜
軒也永金石
我當繼之詩
須公如椽筆
題扁揭諸楣
庶幾後來者
瞻敬毋敢隳

續題前圖

七言內有題鄒
惟久樵懶詩

先生以樵名何事樵
即懶得非懷功名
感慨歲月晚得
非思往昔冠佩習
懶散胡為走荆榛
略不留意挽釋擔
青雲林置斧落日
阪高眠舒兩足
端坐睇雙眼
言待蘇

門生未遇姑且返

贈道士一清子

吾鄉呂氏子在幼已無競束髮為黃冠吐納事清淨自
號一清子取義斯可證一者物之始清者氣之正始則
參太古正則造玄聖風霆生肘腋叱馭出效馨羨子方
妙年駿足逸莫並爾師承禎喬遁世絕機穽已知謝塵
氛俗駕那可聘應從蔡少霞高蹈陟幽巖笑拍洪崖肩
千山藟飛磴會有白雲篇寄我發高興

魯仲連

賢哉魯連子解紛見高情片言大義重一笑黃金輕名
因折秦得功為下聊成胡為昌黎伯却有細兒稱

謝徐士廉醫

醫有按磨科在古乃砭耳學者固自寡授者亦無幾公
能造其奧精妙究厥指我嘗病卧牀公來致調理云是
施砭好欲我病速起生平未經識聞說懼且喜探囊出
錐鑽憂擊顙流泚初疑穴肌肉剗剗入骨縈脫手疾已

失鍼灸安足擬得非華佗傳庸俗那敢爾我生百憂纏
胃次多荆杞煩君併掃除腸胃一滌洗

又

愚者昧調攝適口從所欲竊愧衰暮年不謹貪嗜腹五
藏雖有好五味俱有毒遂使歲一周抱病兩困篤眼暈
空花飛耳虛闕牛觸熱邇燎火原寒居凌陰屋先生小
試手去病如轉囑走丸下危坂駿馬騁平陸自非活人
手我命已鬼錄豈邀千金酬交誼重珠玉復不棄陋巷

車轍每枉辱貧賤結素心高情勵薄俗孰云知己微
千
古得鮑叔

中秋夜露坐

露坐衣袂濕炯炯天無河地偏人事少雲淨月明多
薄
酒不易致閒愁其奈何中庭負清景彈缺動悲歌

三華集卷五

欽定四庫全書

三華集卷六

明 錢子正 撰

綠苔軒集六

七言古詩

長短句
歌行附

追賦萬卷樓

鄴侯昔日三萬軸君今插架侯之續
諺稱積書亦何用
蓋恐子孫難盡讀君之子孫衆莫同一
長材敏而速

秋毫細字束牛腰一覽正須煩過目樓中何必藏萬卷
三館五車皆貯腹昔人種橘及萬株計資尚比封侯祿
焉知多書富且貴開卷相看總珠玉城中高樓連廣廈
醉眼紛紛亂紅綠斯樓動止瞻聖賢禮樂衣冠誰敢黷
我生好習家苦貧閱市無材空碌碌可憐欲讀未見書
館閣何年著愚獨但願此身作蠹魚居公之樓死亦足

仲夏

南湖水鄉平地濕沉復積雨多炎蒸莓苔陰陰上廳事

屋底煩熱居不能污池草豐足蛇蝮白晝蚊蚋來縱橫
兵餘十年不起廢如許困劇難謀生何人架樓連碧篠
思與君子居高明

送孟用賓審理服闋赴京

西神之山何穹窿高挹閭闔窺鴻濛六丁鑿開渾沌竅
溟渤飛出羣蒼龍蜿蜒偃蹇繞惠麓化作九龍橫青空
九龍之山腹崆峒乳水迸竇充其中源流渾渾不知息
霑漑下土蘇凡庸流泉之旁孟夫子開雲築室來居此

身是前朝外戚家建炎冠蓋皆金紫向蒙宸翰表華堂
往日奎章照桑梓夫子乘龍昔已仙只令孫子還多賢
讀書萬卷破鬼膽南宮戰藝曾無前天恩許授赤縣令
試手繁劇能聲傳尋徵刑官相王府適遭母憂歸故園
制終三年俟進止遠道涉暑還朝天驪駒已秣車再脂
中朝虛位公毋遲銘鐘刻鼎公素宜行矣努力瞻光輝

寄明東生

與君昔結方外友同遊日飲無何酒夜歸曾值醉尉嗔

舊事至今猶縮首。別經兵火十二載。我已白頭成病叟。
對人氣促語。即喘聞葺更誰憐。老醜客來未嘗不問君。
盡說埽橋住。還久儒冠頽然。乃丈夫一鉢三衣復何有。
屏除佛氏拜孔子。收拾堅真掃枯朽。又聞力究神農書。
濟衆我知君所守。醫良豈待三折肱。洗髓滌腸今不取。
秘方却要靜中看。莫學青囊常掛肘。埽橋我昔常暫居。
滿目荆榛雜狼莠。近傳鄉里頗整葺。孔道迨迨競趨走。
幾時風雨復連牀。終夜劇談開笑口。相思毋苦勞夢魂。

金匱要略卷六
買舟會繫門前柳

食江魚

人言江魚海中來，跋涉到此味已脫。可憐我非海邊氓，未始江魚見鮮活。想當遨遊海水時，錦鱗耀日光相奪。縱橫自謂無所避，豈意鮫人計侵拏。一雙鱖鱖不受釣，遭網千頭恣拈掇。朝來磨刀向素鱗，猶帶鯉風忍烹割。不惜充庖飽作羹，嗟爾波濤永䟽闊。

挽仲毅姪

甲子九月
十三日也

我衰龍鍾暮景促所欠一死萬事足懷抱相看日復惡
何況頻年哭宗族殺也聰明用有餘自昔父書嘗習讀
多才素為造物忌坎壈纏身勉其祿仲兄五子已亡四
俱在中年遭鬼錄平生積善果何有或者天意開後福
我病無從見蓋棺老淚如絲不成掬煮茗軒空暮雨零
閒雲齋冷秋山綠遙憐總是相思處把酒論文那可復
方今行路多險巇跬步網羅常畏觸我雖生存幸未泯
此後此身安敢卜汝今正命保令終去矣九泉當瞑目

苦寒

今年歲暮常苦陰窮巷寂寂非故林北風號樹冰折軸
飛雪入罅欺孤衾鬪牙自爾相咬嚙戰股疑若登巖嶽
城頭新炭入華屋陽生錦帳春沉沉九重森嚴不可叫
天路峻險難登臨所以終日但僵卧豈為矯首希知音
君不見當時亦聞子桑子裏飯勞苦能相尋男兒致身
在年少白頭困厄徒傷心

贈竹工

百工之製乃用便不獨器利始稱善工之不攻豈為功
師授未許旁觀擅吾鄉竹工曰蔡某四世其業人多羨
年幾八十不支杖白首重逢愈強健竭來吾家進其藝
衆工縮手甘居殿長竿巨幹堅比石迎刃解節如切麩
千絲萬條從矯揉纏繞何如針引線出奇暗中劈竹薄
剖析數層時自銜只今有子復有孫守技不貪心不變
自言平生不過取賈直於人從此願蔡乎蔡乎田父儔
爾獨行高誠少見作詩贈爾表其事敢擬韓公承福傳

贈鄒惟久樵懶圖

陶潛撫琴不著絃
邈韶讀書只欲眠
孰謂二子非前賢
鄒君以樵真浪傳
日走澗底踰山巔
不採不斫徒經年
每歸落日空兩肩
自以為樂人獨憐
乃知世事非必然
遁世寓意芳名全
君不見朱買臣
長途歌謠背負薪
當時良苦端為貧
會稽太守乃其人
懶樵豈能事辛勤
焉知鄒君非其倫

次宜興張以道贈王彥弘詩韻

君不見東方雲海空復青到海賢達如漂萍半因謫官
半放逐性命不足易斗升又不見平泉金谷通杳冥過
者孰敢窺深局當時人傑地亦靈失勢送別勞勞亭乃
知力盡仆不起無異嚴霜殺桑柘金張許史皆寂寞富
貴歛如風過耳即今何人可稱羨遁世嘉名皎如練就
中誰若珠在淵三槐之系王之源蟬聯奕葉傳芳裔易
世猶存金石誓即今雲孫陽羨居雲山為卜歸休計草
堂教子靜看書何似當年清白吏卷畫溪光秋色早映

帶銅棺山更好溪上長竿可釣魚山下平疇宜種稻有
脚不肯行緇塵有手不肯攀青雲煦嗟呼吸乃餘事定
志自可怡心神青絲白馬者誰子馳道訶叱相紛紜每
來叩門笑雌伏鵬鷃雖殊均取足蜉蝣不知僅朝暮
蛄本自蒙寒燠唯君括囊無毀譽無咎正在坤之六祝
君溪山恒厥居在德何嘗陋茅屋

楮拙鱸

城頭積炭如積薪問價不啻如烏銀千錢僅可致一束

此物宜富難於貧田家苦寒肌欲裂頸縮如蝟衣懸鶉
燎原之餘有根柢傍溪倚岸埋輪困取之不復憚勞苦
長幼負荷來紛紜風吹日炙硬於鐵衆所共弃我獨珍
朝來茫茫雪一尺十戶九閉無行人撐枯支朽鑿地窟
要使寒谷回陽春大兒吹烟小兒撲龜手雜沓趨氤氲
須臾和氣溢茅屋不信世上純綿溫翁言病偃苦難療
何得曲脊今能伸禦寒之策此為上富兒底事燔烏薪
君不見楊家當年勢絕倫獸爐漫爇金麒麟

看花

數株李桃能白紅看花喜與知己同便須呼酒與君醉
及此兩日天無風君胡鬱鬱不肯飲對酒自合開懽悰
男兒得失固有命何用種種留心胷無稱焉取景千駟
樂道獨言顏屢空蕙蘭槁死同草芥不必計較論始終
飛霜漸添向來髻衰貌已非前日容明朝世事浩如海
且發笑口毋怨忽

樽有酒

樽有酒前致詞勸君樂飲君莫辭北邙荒塚麟參差九
泉誰能慰相思昨朝花開日杲杲今朝風雨花如掃長
年何人得滿百鏡裏朱顏豈嘗好君不見楚屈平江水
至今流恨聲又不見醉劉伶荷鍤隨行無日醒兩賢身
後俱寂寞苦樂得失君當評

竹林避暑

竹風清竹陰涼竹林可消炎日長移牀竹下引壺觴散
髮不必拘冠裳吹來時挹細細香何待鬱金與都梁東

隣冰井百尺強中有瓜果可取將紅塵紫陌朱絲纒往
直明光汗翻漿我方夢遊無何鄉

樽有酒

君不見蒼梧山二妃叫虞舜虞舜一去不復還當時淚
洒湘江上至今有竹留其斑又不見峴首石羊公得嘉
名勝遊轉眼成塵迹依然行客復登臨不知有淚何人
滴樽有酒君當斟不須躊躇勞苦心昨宵花發紅滿樹
今日東風吹綠陰人生何為厭歡伯座中誰是長年客

鄒惟順惠酒茗

鄒惟順惠詩及書并
以茶酒新橙見寄

荒村值積雨窮愁苦欺凌行客絕來迹唯有睡思相牽
縈昏昏欲就枕忽聞扣柴扃開門見僕夫手携雙酒罌
園橙與山茗佳貺雜沓相合并且言鄒處士將意多寄
聲抽出尺素書上有賤子名開緘知相思倍悉契闊情
書尾復致詩辭新句尤清友道廢已久爾獨尋寒盟便
當歌君詩啜君茗酌君酒剖君橙掃除胸中渣滓及蕪
穢一洗心目俱開明仁者之惠那可辭安得報以南州

之魚金與夫藍田之瓊瑛

有客歌

有客有客聲悲酸
肌肉皺裂衣不完
問之蟬聯貴公子
門戶凋喪身飢寒
故交滿眼孰肯顧
况望凋卹邀盃盤
當時意氣動山岳
此日彷徨摧肺肝
君不見炙手可熱
揚與霍失勢親知皆寂寞

鷓鴣行

長空餓鷓嘯且飛
終日不飽常苦飢
凌雲一竦兩翮齊

瞰荒千尺兩眸低隣翁歲歲畜乳雞衆雛啾啾依母棲
天晴日暖風力微塲頭逐隊羣相嬉餓鴟垂涎作意窺
捩身一掠無空歸不煩老拳苦禁持吞腸食肉曾無遺
十年何止攫千百計較爾罪何勝誅天公胡為容此食雞
物日殺百命誠非宜豐林豈乏卧獐兔茂草亦有閒狐
狸此徒不取取民食公然肆虐天弗知我願鳳凰嚇怒
殺此害民鳥坐令天下雞母蕃息其庶幾

燕氏童童歎

伊昔有客燕童童聳肩巨目雙眉豐布衣百結不掩膝
赤脚奔走凌三冬相逢問之語悲咽再拜向我稱孤窮
自古祖裔本京兆有元征進陞武功金牌千戶許世襲
乃父移鎮來錫峯相承富貴頗烜赫鐘鳴鼎食皆名公
當日童童未解事錦衣繡帽方愚蒙珍羞作劑乃常餌
綵輿轉步隨西東繁華幾何人事改門戶凋落遭喪凶
此州至今多父執意望閭舊收奴童我聞斯語淚為酒
每欲薦舉嗟無從秋風春雨非一日漂泊不知何所終

哀哉此事三十載到我困苦成衰翁我今榮辱不必較
未卜究竟安踈慵故人舊遊孰肯顧今古物理皆同蹤
底須遠追燕氏事行復我輩成風蓬

槐木拄杖歌

葉生惠槐木拄杖作歌以謝并示月可庭和尚

葉生歸自江之湄行李何物稱瓌竒囊中所將不足數
獨有拄杖眼見稀老槐初截黑龍角瘦骨已削蒼虬皮
既堅既實不華麗八手盡訝光陸離葉生念我性所好
欣然首肯贈一枝為言吾年足力已衰弱此物與我正

可相扶持我今得之良有以腰膂更不愁攀躋緩隨流
水宜步屨坐看雲起堪撐支只愁溪西老月借去不肯
還挑包竟入天台山談禪莫作獅子吼脫手却作蛟龍
走

無義行

用警後
之君子

憶昔與君交君時少年苦飢寒憐君贈之錦綉段不惜
侑以青琅玕丈夫契合在貧困正擬歲晚同悲歡感君
當時亦有言指日涕淚傾肺肝別去二十載聞君名有

成身居美官調上京當途紛紛多送迎我雖龍鍾厄枯
朽猶望臨歧一攜手長堤折柳擬君行馬首已東君去久十
年不寄半行書往日論心復何有世情冷煖實難期切
莫結交輕薄兒

寄題水樂軒

長短句

我生有兩耳不喜笙與簫豈徒笙與簫未解濩與韶君
不見赤甲白鹽天下奇昔年捫參歷井曾攀躋中有飛
湍瀑溜界我眉衝崖觸石雅韻世所稀我獨好此太古

之音衆莫知自從歸來屋底坐歎息欲說此音誰省識
聞君結茅山之巔所好亦為聆流泉君之懷抱與我合
惜未握手相負緣茲泉不洗凡俗耳茲聲不必齊管絃
湯湯浩浩豈絲竹琅琅雅與金石聲相宣我雖知公心
未獲臨公軒懸知六月炎暑暍行客公獨竹牀石枕方
高眠唯公未知我知我應相招我當抱琴過君操一曲
公其為我商聲謠

自慨

干賊每笑張齊賢累人忽作閔仲叔平生未信狂禰衡
餘子可是俱碌碌男兒窮達豈易量屠牛苦熱漿苦涼
時來自與風雲會步騭何諂焦征羌

對酒

浮雲飄飄不停飛日日迅景東復西人生塵世不百歲
朱顏綠鬢得幾時誰為達者開口笑相看往往攢雙眉
仙人視我若螻蟻何苦塵土爭奔馳

未葬

前年喪孫復喪妻去年喪母心肝摧至今白骨寄淺土
力薄未葬魂安歸君不見三喪不舉古有之麥舟之惠
於今稀

憶梅

我昔南窓下江梅有嘉樹醉吟倚南窓時時得新句却
從一別故園春十載行蹤污客塵窓前此日梅花發不
是當年對酒人

霜葉

濃霜槁木葉不振已欲零因風墮空砌錚然金石聲行
矣歲云暮華髮日日生落木春來生意還吾衰那得回

朱顏

折楊柳

折楊柳贈別離相思各在天一涯勸君莫飲金屈卮故
人不在陽關西綠波漫漫草萋萋山長水遙無盡時折
楊柳贈別離行人未發楊花飛飄飄隨風何所之臨歧
不用多歔歔梅花開時子當歸折楊柳贈別離莫學楊

花無定期

贈刀工謝伯玉

君不見謝公煉鐵爐火紅
燄光吐出金芙蓉鑄成寶劍
揮白虹信是靈異之物驅神功
功成太平無所用仆卧
匣底藏蟠龍只今謝公久蹉跎
高蹇濶步誰遮羅相看
依舊眼雙碧偉氣直與秋空摩
時來湖上就我飲忘形
爾汝同酣歌謝公謝公世莫儔
家徒四壁何曾憂南湖
湖山多滯留抱藝不肯干
王侯空携佩刀二十秋
欲有

所贈難其投時無呂虔志未酬却將故刀歸故丘

桑椹歌

桑葉綠桑椹肥家家採葉滿筐歸養蠶作繭歸恐遲城
南老叟餒莫支腸柺力竭語亦微無人摘椹餉翁飢嗟
吁世事良可悲

仲毅姪兄弟招飲以詩謝之

十月五日冬屆始霜風瀟瀟木葉委稭稊歛獲四野空
農功告成田父喜我生偷閒幸多暇日飲無何荷隣里

即今小阮又見招竹杖芒鞋復來止大瓶貯酒几設肉
菜簇青絲盤寘鯉且言吾宗凋喪餘尊行寥寥苦無幾
孟行動携二三幼父子溫溫皆盡禮奉觴加拜稱再壽
使我狂歡弗能已自誇往昔常大白華髮只今嗟老矣
須臾客醉我亦醉落日在山容我起

三華集卷六